

Schunn widder Dunnersdaach

Letzt Woch hott misch de Schorsch oogerufe. Honnes, hodder gesaad, saache emol, gieht bei dir aach die Woch su schnell erum? Ei glaabsde, kaum iss de Moondaachmoie doo, iss aach schunn widder Dunnersdaach. Wie gibsdn su ebbes?

Ei Schorsch, saach isch, du host recht, die Zeit gieht alls schneller erum, awwer warum seesde grad dess vumm Dunnersdaach?

De Schorsch dut ze Antwort gewwe: Weil dess de oonsische Daach in de Woch iss, onn dem mir zwaa, dess Kättche unn isch, sesomme ebbes vorhawwe.

Su, su, saach isch, ihr zwaa habt alle Dunnersdaach was vor – ei was donn?

Doo giehn merr sesomme oikaafe, seet de Schorsch, doo konns reeschene odder schneie odder fuffzeh Grad kalt soi, omm Dunnersdaach muss isch mettem Kättche oikaafe gieh. Mir hawwe enn Kalenner in de Kisch hänge unn schunn onn Neijohr mächds Kättche ferr jeden Dunnersdaach im neie Johr e rot Kreizje in de Kalenner, dess heeßt, koon oone Termin ferr Dokder odder Verein odder sunnst ebbes konn doo oigetraache werrn, weil omm Dunnersdaach duts nix gewwe außer oikaafe gieh.

Isch druff: Dess iss doch nitt schlecht, Schorsch, mir giehn aach dunnersdaachs oikaafe unn Ordnung muss halt soi.

Awwer su doch nitt, rieht de Schorsch ins Telefon, weil wenn isch mondaachs uff de Kalenner gugg, doo grinst misch dess rote Kreizje oo unn dut merr iwwers Aache ins Ohr flissderrn: Schorsch, isch kumm! Unn dessdeweese moon isch, dorsch dess deet die Woch wie nix erum gieh. Villeischd iss awwer aach ebbes onnersderrn droo schuld.

Ebbes onnersderrn?, frooch isch, ei was donn?

Doo pischberd de Schorsch: Isch habb beim Dokder enn Monn getroffe, der hotts merr erzählt: Die Daache unn doodemett die Woche werrn immer kerrzer, weil die Erd sich immer schneller drehe dut, mir deedes nor nitt merke. Deede mirs werklisch nitt merke?

Isch saach: Naa, dess deede merr nitt merke. Die Sunn gieht uff, gieht unner unn gieht widder uff – unn dezwische sinn halt vierunnnzwonnsisch Stunn, egal wie long die sinn.

De Schorsch war kaum noch ze heern. Siehsde. Unn die wisse dess!

Isch frooch: Wer? Su Spinner wie der, den du getroffe host?

Naa, haucht de Schorsch, die Amis unn die Russe, die wisse dess, die halles nor geheim, weilses selwer gemacht hawwe.

Was hawwese selwer gemacht?, frooch isch, unn wie solleses gemacht hawwe?

Doo seederr: Mett ihrne Rakete unn Sadelitte! Die gewwe dorsch ihrn Rückstoß de Erd bei jedem Start e bissi Schwung, e bissi nor, awwer jedes Mol dreht sich die Erd e bissi schneller. Die Amis unn die Russe wisse dess, awwer halles geheim, die wolle die Menschheit nitt verrickt mache. Unn außerdem wolle mir allminonner joo aach die Sadelitte hawwe, ferr die Händys, ferrs Fernsehgugge unn ferr die Navis im Audo unn su. Unn weil merr dess all hawwe wolle, misse merr demett lewe, dass die Erd sich alls schneller drehe dut unn die Daache unn die Woche allsfort kerrzer werrn, doo iss nix mehr droo ze mache, hott der Monn gesaad.

Isch druff: Aha, dess hott der Monn gesaad. Unn du glaabsd dess?

Ja, hott de Schorsch omm Telefon ze Antwort gewwe, isch glaab dess. Warum sollt sunnst noochem Moondaach gleisch druff schunn widder Dunnersdaach soi?

Eiern Honnes